


黔行水程記



自敘

濟陽旅館我心傷悲夷州山衙方寸尤亂窮冬忽
忽無以為生自念奔走天涯當知珍重戚戚終日
寔曰非宜迺於春間取當年舊作重事推敲定
為陋卷集一卷春夢集一卷詩餘一卷夏間讀
晉書集錄記金石一卷記異聞一卷秋間成漫
錄一卷石阡物產記一卷寒冬無事檢上年舟
中日記詳其夷險證以見聞復成黔行水程記
一卷以支離憔悴之身當落寞窮愁之地不惜
此三百餘日光陰盡消磨於筆硯間者豈為著
述計耶以寬吾心以遣吾興而已此書既成吾將
理行裝問歸程返我故鄉與家人相聚出此七八
卷書以示吾弟也姪也以贈吾友與朋也見吾之
書可知萬里之外一年之中吾一身之宦况矣他



日返旆春明移舟鄂渚未来之事又不知將何如也

光緒二十二年十一月志青氏自書



黔行水程記

光緒甲午臘月奉

命出守石阡次年乙未二月出京師到籍小住一月以三月十七日夜十一鐘由津搭輪船以行

船名連陞

是夜蘊清族祖士林弟悅山姪及大二三四五諸姪登舟送別

十八日微雨早由紫竹林開船午後四鐘出大沽口

十九日早十鐘至烟台停泊三時許晚五鐘開船

二十日過黑水洋水色清碧與傳聞如墨者迥別

二十一日早微雨午後入吳淞口五鐘抵滬投寓於三洋涇橋泰安客棧一路風平浪靜毫無所苦船中遇故友

謝子石同年之壻及姪

二十二日吳紹伯大令

宗周貴州大邑知縣因解鋁來京結伴

携其姪來訪鄉人紀

錦齋兄招飲午後族聯浦弟

繼珠

來訪晚招飲燈下

作家書

二十三日早趙翰墀姻弟來訪晚聯浦弟復招飲

二十四日午後紀錦齋兄約遊愚園張園徐園三處晚留

飲愚張兩園池台亭榭皆極繁華並各色花木紅

綠鮮妍但一種塵氛未能免俗徐園自然幽雅地

僻人稀尚有舊家風味是日於張園遇陳次亮同

年熾別五年矣聞其次日北上

二十五日早鄉人張星橋兄招飲晚鄉人賈潤生兄招飲廉

浦翰墀均來訪

二十六日早翰墀招飲午後廉浦携兒輩遊愚張兩園

吳遜之祖悌紹伯姪也來訪

二十七日早微雨廉浦招食鮒魚滋味鮮美正莫春恰好時也春筍

甚肥長二三尺許瓢菜青翠可喜油菜香而嫩鱸魚松江土產小而肥

黃花魚質大而肥麩條魚海蟹均與吾鄉無異刀魚瓶魚均肥嫩

豆腐精品枇杷少酸

二十八日早雨止自二十七日雨至夜檐溜尤急二十八日已

刻漸歇午後新霽為鄉人書扇三柄紹伯來訪

鄉人劉子鶴大令樓壽為癸酉年姪榜下以知縣分

發江西晤於泰安棧次日赴九江矣賈潤生兄餽食

物數種

二十九日晚紹伯招飲燈下小雨為鄉人作隸書對聯是

日定作蘭筆三支

京國遙遙感別離暮春三月雨如絲此行慰我無

多事江上鮭魚恰好時

三十日早鄉人汪林孫兄招飲路遇王夢九兄錫齡亦鄉

人時差次滬上晚夢九來訪

四月初一日廉浦來訪午後訪錦齋諸君均得晤林孫

送食物潤生送茶燈下寄大女大姪書

初二日午後五鐘上安慶江輪船錦齋送茶點錦齋廉
浦翰墀各登舟送別

初三日丑正開船午正至通州界四鐘至江陰界六鐘至泰
興界十一鐘至鎮江夜不能辨

初四日早至金陵小雨望城樓在指顧間九鐘過采石磯
十一鐘至東西梁山午後二鐘至蕪湖晚十鐘至大
通急雨

初五日寅正至安慶小雨八鐘至東流十鐘過馬當青翠
迴環山容如畫綠陰深處一簇村居江面至此開闊
異常波平似鏡想見當年王勃一帆風順時也十一鐘
過小孤山萬頃澄波一山中立天然竒峭好景無雙
片刻許至彭澤萬山重疊惟林巒烟雨而已午後
二鐘至湖口四鐘至九江舟由城下過百雉雄關俯
臨江面人烟輻湊山色排連形勢正復可愛八鐘

至武穴夜至蘄州途間因雨未得望大孤山他日
重遊當留意也

初六日寅初過黃州惜夜深不見赤壁午初至漢口
寓馬王廟河街高陞棧

行大江三日許望南岸羣山岡巒起伏氣象万千
北岸則偶一見之無甚佳妙處也

安慶輪船管事人唐虞卿山東黃縣人與潤生廉浦
相善舟中待客情意殷殷可感也

舟迴雲影天光裏人在斜風細雨間三日江行最佳
處馬當山映小孤山

自上海至漢口江行路程凡二千二百四十里

吳淞三十六里 狼山一百五十里

江陰一百九十里 西山一百九十里

三陰六十里 鎮江六十里

儀徵六十里

南京九十里

采石磯九十里

梁山五十里

蕪湖四十里

荻港九十里

大通九十里

中陽九十里

安慶九十里

東流九十里

馬當六十里

小孤山二十里

彭澤四里

湖口九十里

九江六十里

龍坪九十里

武穴三十里

田家鎮二十里

蘄州四十里

道士袱六十里

黃石港三十里

黃州九十里

葉家洲九十里

楊邏三十里

青山三十里

漢口三十里

初六日登江干酒樓望對岸武昌城郭如在目前惜

黃鶴樓僅存遺址而已晚寄家函並致賈潤生

廉浦弟一函

初七日午後訪鄉人李仁甫劉璞臣兩兄於鮑家巷
歸來細雨紛紛也漢口市面繁華與滬上無異
惟街衢窄狹校吾津尤甚

初八日子刻急雨片刻許午後遇黔人戴壽臣太史
秦仲友大令於客寓燈下寄胡虎臣駕部趙芝

軒姻弟各一函

初九日午後沿江步行望檣帆如織居民樓房連亘凡
數里許也

初十日得鐵開元泉一枚食江魚肥美

其大者長七尺

十一日早微雨至午後止

十二日早吳紹伯偕其姪自滬來

十三日微雨午後頓熱

燈下拓古泉寄大姪

十四日觀潮是日江水陡漲波翻浪捲襄漢爭流風起濤
來其聲如吼唐人不盡長江滾滾來白真寫得出
也燈下寄徐菊人太史一函

十五日雨至夕而止

十六日晤貴州試用縣丞高君鳳靈 字梧山山陰人於客
寓

十七日漢口鎮屬漢陽去城約五里

十八日午後上船

船主李姓麻陽人俗謂麻陽船

十九日停泊

二十日早開船舟緣漢隄行隄以大石築成長數里其工
甚堅望隄上晴川閣古洗馬口濂溪祠見漢陽城半
面並過鸚鵡洲城與武昌對岸

二十一日夜雨至次日辰刻止見江豚長數尺出沒水中
其頭如豬色深黑隨波逐浪結隊而行

二十二日午後三鐘得順風舟行甚利至夜十一鐘始停泊不知其處自漢口而下每日停泊之所地名不
過得其仿佛以土音難辨僅備記載而已

二十三日泊白鷺洲二水中分然非唐詩所指之地屬嘉魚縣沿隄居民數百家有小船數隻開燈賣烟來
往於客舟之側內少婦一二人如花船也

二十四日泊新隄屬沔陽州市面長數里人烟輻湊商賈數百家生意之盛與漢口略似

二十五日泊螺山屬荊州江陵縣去城六十里岸有吳王廟戌刻雨至二十八日午後止

二十六日舟自岳陽樓下過泊岳州城南五里許地名南津口由此入洞庭矣岳州城臨大湖附郭而居人家稠密樓上白扁額岳陽樓三字筆意古拙西行三里有高塔危立與樓相映

二十七日守風南津口岸有小山漁者兩三家結茅棚
而居雨笠烟蓑扶罾弄網望君山

二十八日出洞庭泊營田汎屬湘陰縣是日順風利甚
一日之間舟行二百里極目汪洋茫無涯涘一舟如
葉搖簸其中巨浪掀天長幾數丈舟中人皆變色
危坐其險異常至今思之猶為心悸按洞庭古
長八百里今中間淤出百數十里湖分為二故
有東湖西湖之名舟行東湖不過三百里惟居中
二百里遇風為險其前後皆有岸可依不似無邊
大海也

二十九日泊人字口屬湘陰水分兩岔因以得名岸有
洞庭廟鎮江門三四里人家鄰接

五月一日泊沅江縣城外聞割麥插禾禽言

初二日泊楊閣老萬壽宮前屬龍陽縣

自過洞庭萬樹蔥蘢濃青夾岸其人皆編茅
成屋引水澆田水色山光自是江鄉風景

櫻間野竹高柳長槐沿湖以千百計又有長條
細植葉如刺梅花如白丁香叢雜而生垂垂於兩
岸間者可愛而不能識

初三日泊姚塘屬龍陽自午後雨至夜止

初四日泊牛鼻灘屬武陵縣

初五日泊常德府城下遠望城外有兩塢對岸而立即
到矣是日端陽城下居民鮮衣楚楚觀競渡而
歸足見地方熱鬧首縣武陵

初六日停泊得大和泉一枚

初七月初八日皆停泊

常德府學牌坊景隆齋茶食鋪葷葱餅滋味
極佳雖都中不及也

初九日泊桃源縣山下渙舟獲鱖魚重三斤買而食之
鮮美無比是日酷熱

初十日早雨午後止泊桃源洞口外山重水複風景絕
佳昔日避秦之人祇今何許但見碧杉翠竹掩映
參差時有青綠水禽飛鳴枝葉間樂意相關自
成天趣真紅塵不到處也

由此入灘河兩岸皆大山中夾一水雄岡峻嶺
起伏排連歷辰沅兩府直抵黔界凡千數百里曰
河寔則山澗深不過四五尺淺止一二尺河底平鋪
碎石大如斗而小如粟其大而出諸水者則為小
山為亂石卧於下者則如倒墻如磴級淤出之地
則石子成堆不啻億千萬萬計灘凡數十處如清
浪灘金絲洞高麗洞滿天星等皆著名奇險舟行
過此極半日之久數十人之力始得進遇淺則舟

閣於碎石之上亦非數十人推挽扶持不能行其難
如此格格然船底有聲一日不過行十里時當炎暑
天旱水乾雖有智者無所施其技矣至沿河城郭皆
負山面水無復繁華鄉居村落多則十餘家少或
一三家架木編茅荒涼殊甚自曹家溪入黔境尤
為蕭索不堪入目

十一日泊桃源界之寡婦山下

十二日泊絡緯屬辰州府沅陵縣是日由友人馮莘垞兄
門外過

十三日泊沅陵界之荒山下地多菰蒲別無居人不知其
名是日過清浪灘峻嶒怪石林立水間中有口門
其寬數尺溜為亂石所逼直注而下其流甚急船行
到此篙子皆為色變汗水淋淋喫力可想岸有多人
負緇而立船夫呼之來以助力過灘後每一人得碗

計數斗與之

十四日午初始聞雷泊楊家塘

十五日泊辰州府城門外觀競渡舟坐數十人各持短
槳分水而行數舟爭進以誇其速餘人或搗鼓
或搖扇或粉墨塗面作種種醜態相為嬉笑地
當府治尚屬繁華士女遊觀扁舟容與自是
南中景象

十六日泊舒溪口

十七日泊白龍巖下數山壁立景物蒼然秀拔雄奇絕
無依傍其高千丈形如畫家之烘遠嵐有天外
三峰之勢是日過馬駒崖崖勢高低相間渾
如卧馬崖旁有兩穴相隔數十丈在半山之
腰非人跡能到一穴中置木箱一置几案雖
皆殘缺其器猶存相傳昔有仙人比鄰而居不